

Fenomena air pasang besar diramal landa Kelantan

Kota Bharu: Jabatan Meteorologi Kelantan meramalkan fenomena air pasang besar akan melanda negeri ini pada 14 Disember depan.

Pengarahnya, Rabiah Al Adawiah Zakaria berkata, penduduk diminta berjaga-jaga dengan mengambil langkah pencegahan banjir supaya dapat mengelak sesuatu tidak diingini berlaku.

"Untuk Disember ini, jangka taburan hujan di kawasan klauster adalah 450 milimeter (mm) hingga 600 mm manakala di kawasan pedalaman, kadar taburan hujan adalah 430 mm sehingga 650 mm.

"Mengikut bacaan berkenaan, kadar taburan berkenaan mampu menyebabkan paras air di sesetengah tempat meningkat ditambah dengan fenomena air pasang besar serta musim

monsun timur laut," katanya ketika dihubungi di sini, semalam.

Rabiah berkata, orang ramai boleh memeriksa taburan hujan yang lebat melalui portal met.gov.my.

"Melalui portal berkenaan, semua amaran berkaitan taburan hujan lebat turut dapat diakses bagi memudahkan orang ramai mendapatkan maklumat," katanya.

Sementara itu, Rabiah berkata jambatan sementara yang menghubungkan Gua Musang-Jeli, tenggelam akibat taburan hujan yang tinggi daripada biasa di kawasan pedalaman Gua Musang, kelmarin.

"Mengikut bacaan stesen meteorologi di Gua Musang, kadar taburan hujan di kawasan berkenaan mencecah 45 mm namun pada hari ini (semalam) tiada hujan direkodkan di kawasan berkenaan," katanya.